

XXXII

1369-XII-22, Salamanca.—Provisión real al concejo de Murcia, perdonándole los ocho mil trescientos treinta maravedis que el dicho concejo había tomado de las rentas reales. (A. M. M. Cart. real 1405-18, eras, fols. 29r.-v.)

Don Enrique, por la gracia de Dios rey de Castiella, de Leon, de Toledo, de Gallizia, de Seuilla, de Cordoua, de Murçia, de Jahen, del Algarbe, de Algezira e sennor de Molina, al conçeio e a los alcalles e ofiçiales de la çibdat de Murçia, salud e gracia.

Sepades que viemos vuestras peticiones que nos enbiastes, entre las quales nos enbiastes dezir que quando el conde don Johan Sanchez Manuel vino a la dicha çibdat de Murçia ante que a ella veniese que vos otorgara e prometiera de nuestra parte que qualesquier maravedis que ouiesedes tomado de las rentas que recabdaua Pascual Pedrinnan que vos non seran demandadas e que vos diera por quitos de todo lo que auia des tomado fasta que murio Pero Gil, e dezides que lo que tomaredes de ally adelante que los tornasedes e que lo que ende tomaredes que fueran treynta e nueue cafizes e vna fanega de trigo de quatro fanegas el cafiz que se contara a dos maravedis en aquella sazón que monto en dineros dos mil maravedis, e más de otra parte mill maravedis e mas çinco mill e treynta maravedis que monto ocho mil e treynta maravedis, et nos enbiauades pedir merçed que vos mandamos dar nuestra carta para qualquier que ouiese de recabdar las dichas rentas que vos non demandasen los dichos maravedis.

Sabed que nos plaze dello e tenemos por bien que vos non sean demandados, et por esta nuestra carta, o por el traslado della signado de escriuano publico, mandamos a qualesquier que ayán de coger o de recabdar en renta o en fieldat o en otra manera qualquier las nuestras rentas de la dicha çibdat de Murçia agora e de aquí adelante que vos non demanden los dichos maravedis, ca nos vos los quitamos. Et non fagades ende al so pena de la nuestra merçed.

Dada en Salamanca, veynte e dos días de dizienbre, era de mill e quatroçientos e siete annos. Yo Miguel Ruiz la fiz escreui por mandado del rey.

